



Regd.No.19134/88 <http://www.kbc.org.in> NAI/220/99
No-G-4/Regd.Magazine/KBCThuso/MNP-81

KBC THUSO

So484

Kum 56 Ihinna

Lhalam/September 2019



KUKI BAPTIST CONVENTION EXECUTIVE COUNCIL

CHRISTIAN EDUCATION OCTOBER EVENTS

Education Day - 08
LOM Resource Centre - 15
Worker's Retreat - 23 - 28

"Kapa theng, emi pumkhat ihri bang a amaho jong
pumkhat ahitheina ding un, Nangman amahohi hong in"

John. 17:11

WORK
CHURCH
IN COLLABORATION WITH MB
KBC
12th & 13th Aug

**Peace workshop on 12 August 2019
at KBC Chapel Hall**



**One Day Skill Development for
Christian Worker's a Resource
person Mr. Jamlenmang Kilong
Regional Facilitator, CMAI le Dr. Kim
Haokip Chuleh Mrs. Esther
Project manager, Shalom.**



**KBC Gambih No 18, Karbi Anglong Youth Camp 2 - 4 August 2019
at Amrizan Mission Centre - Sponsored by KBC Youth Department.**

CONTENTS

THUMAKAI HO

1. Christian Education/ <i>Editorial</i>	1
2. EDUCATION SUNDAY/ <i>Rev. Onthang Haokip,</i>	3
3. Envisioning LRC/ <i>Rev. Kaikam Chongloi</i>	6
4. Paul's life & ministry/ <i>Rev. Ngamjapao Haokip</i>	11
5. Mission Column	13
6. Men Column	17
7. Youth Column	18
8. Literature Column	21
9. Report	27

EDITORIAL BOARD

<i>Chairman</i>	: <i>Rev. Tonglet Haokip, President KBC</i>
<i>Editor</i>	: <i>Dr. M. Thonghosei Haokip, General Secretary</i>
<i>Joint Editor</i>	: <i>Rev. Henjalen Doungel</i>
<i>Contributing Editors</i>	: 1. <i>Rev. Letpu Kipgen</i> 2. <i>Rev. Onthang Haokip</i> 3. <i>Rev. Kaikhokam Chongloi</i> 4. <i>Pastor Paokhohao Haokip</i> 5. <i>Pastor Satminlen Khongsai</i>
<i>Cir. Manager</i>	: <i>Ms. Lhingjanem Haokip</i>
<i>Design & Layout</i>	: <i>Hemkholen Haokip</i>

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.

Editorial...**Christian Education****Editorial**

"Ahin nangma vang nakihilsa chengse le naphot chetsa chengsea chun dingdet jingin; koikoiya kona kihila nahi nangman nahenai. Chule huhhinga umna dinga nachihisah thei Pathen lekhabu Theng chu nachapan laiya pat a nahin hetsapeh ahitai."

2 Tim. 3:14,15.

Thumakai:

Amasatah in muntina um Kuki Christian chate jouse ahideh a KBC member ho jouse chung a Pakaiyu Jesu Christa minin salaam kahinpe cheh uve. Tulha thupi chu Christian Education ahi toh kilhonin, hiche thudol ah itih a hoilaiya hung kipan ding ham ti chomcha ana kihoulim u hite.

Judate pasal chapang khat kum 5 dung lhin teng le amaho lekhabu (Old Testament) asim pat ding ahitai. Chule, chapang chu ahung hamdoh theiya pat a apa'n ama chu sun le jana Pathen thu a akihoupi pat ahi (Deuteronomy 6:7f). Timothy chu anu Hebrew numei ahitoh kilhonna achapa chu achapan laiya pat a Pathen thu lunglut tah a ahin hil pan ahiye.

Paul in tahsan jalla achapa Timothy henga ana sei khu ivet leh thudih tah le loupitah tah point phabep akimudoh theiye.

Khatna ah, Pathen thu aneo laiya pat a hung kihil/kisei peh ho chun tahsanna a dindetna anei theiye. Tulaiya houbung chomchoma chom lele ho le ahou khel lele theiho hi aneo laiya Pathen thua kihilna phatah neilou ahiuve ti aphochenne.

Anina ah, insung mipa bouvin achapa ahil ahipon, anu, chule adang dang hon jong hiche kina hin pan nasatah alah u ahi ti ahi.

Athumna ah, hiche Pathen thuhet chun huhhingna aso e. Isunga um Pathen thu chu Lhagao Theng chun ilung sunga muchi chu ahin khanlet sah a, hung gadoh/pi lhing thei ahin, huhhingna kipa umtah asodoh ahi.

Tulaiya houbung kimkhat in achepi: "Chapang ahilaiyin man in" (Catch them young) atikhu eihon jong ibolu angaiye. Christian education hi chapang neolaijapat a chena ding dol ihil le ateh geiya jong asuhmil lou ding ahiye. Prov.22:6 na ven.

Chunga ihin vetnavah, Christian themjilna ahung kipatnachu Christian insung ahin, mihem achapan laiya ahung kipat angaiye ti imu tauve. Hiche toh kilhonna Christian mipa le minu kikhol angaiyin, athahbeh a hiche chate aneolaiya pat a Pathen thua khoukhahna ding mopo ihinau athah beh in hedoh u hitin tong tau hite. Lunglut tah a sim jouse chungu Pathen vangpeh chang taken.

EDUCATION SUNDAY

Chihna le hetna holjeh a KIPAMAN

(Proverb 2:6)

*Rev. Onthang Haokip,
Secy.Christian Edn Board,KBC*

SERMON

Pakai thisan a lhatdam kachankhompri Houbung mithengte jouse amasapen in Christian Education board thakhel in min ngeipen I-Pakai Christa Jesu min in kangailutnao Salam kahinpeuve. Tukum 2019 a jong Pathen in 'EDUCATION SUNDAY' nikho eimusah kit jeh un amintheng thangvah in umhen. Tukum Edn Sunday September 8 nia imandiu ahitoh Ihon'a kigochaisa leh phatecha a mangcheh dingin ikitem uve.

Education Sunday ahung kipatdan thusim chomcha:-

I hetsau hitajong leh avel'a igel-doh diuva dei um chu, England gam'a Robert Raikes kitipa, Sepoy ahi. A Sepoy pan ahainung in England khopi khat Gloucester kiti mun'a chu 1780 chun Factory'a natong ho chate Sunday nileh amoh vathai jiu chu phamo asah jeh in Meredith kiti Meithai pi In-ong khat athum in, hi a chun chapangho chu Pathen Thu le La ahiljin ahi. Minu mipa hon pha asah l'eh jeng jeh un amaho jong ahungkaiji tauvin ahileh hichu Sunday School tia ahin minvo u ahi.

Robert Raikes statue cast at Gloucester, England on June 3,1880

1880 kum chun Sunday School ahung kiphudoh kal kum 100 lhinna Sunday School Union ten Gloucester mun'ah thupitah in amangun, ahin phutdoh pa Robert Raikes lim achunga Statue hi anatanpeh un ahi. Hiche nikho 2nd Sept. hi kum sih leh kimang jing ahin, 20th Century lam'ah 'UNESCO' ten 'WORLD EDUCATION DAY' tia manding in thulhuhna ahin sem'un, tunia eihon jong hiche nikho hi Taona leh thilpeh, Jilna mun ho, Jilkung ho leh Jillai te a dinga taopehna nikho'a imanjiu ahi.

Education BIDOI:-

Education thucheng hi Latin paova “educare” kiti a kon kiledoh ahin, hichun “ keiman kakaithouve, keiman kho kamusah e, chule adang tampi a hitia hi kiledoh ahi. Alhangpia seidin Education hi mihem khat in aneilouva khoh gou lutah tobang ahi. Angailu a akhohsah chan in phatchomna amuteiji ahi. Hijeh a chu Solomon in “Chihna chu domsangin, chutileh chihna’n nangma nadopsang ding ahi, ati. Education kiti thucheng hi kimkhat ten ahethdan u anem jeh in Inchen khosah, nampi dinmun leh gamsung khantouna lam ah mi nung phajou louvin aumin ahi. Kimkhat ten chihna hetna neitah bangin akigelun, hinlah chondan hindan ahethempouve. Ajeh chu thildang hilouvin chihna hetna pepa/aneipa Pathen ahethlou jeh ahipen e.

Thuchih(Proverb) lekabu’a Chihna le Hetna thu kisei hi Pathen chihna aseina ahi. Leiset mihemte chinghen them jong leh Pathen ahethlou chun Pathen in angol’a asimthou thou ahi. Colosians

2:3 a chun Chihna leh hetna kiti hi Gou lutah ahin, hichu Pakaija kisel ahi, ati. Hichu mihem ten aneipa kom’a ithumdiu eihetsah uve. Athum nomlou, aholnomlou ho chu mi kiletsah ahi, tin Bible in aseije.

Houbung La a isah u, “Hol lute lungthengin, lhagaova gunchu tah in,” atibangin Pathen chihna thupha hi ngaito a, ngaichat a holding ahi, tihi tukum Edn Sunday thupi a hung kitah doh ahin, hichea kipaman chu, Hinna, damna, lungmonna, chamna chule kipana ahi. Mihem hinkho a Pathen lungdei hetdoh hi imalam jouse a lolhinna ahi. Lekha thepna hihen thildanga hijong leh Pathen a kon ahi ti helouva Pathen douna a mangcha ho chungu Pathen in nikhat leh thonlouva thutanna aphondoh nikho umding ahi. Chihna hetna hi Pathen thilpeh ahin, ahethem te chungu kiphonna a Leng Solomon in Prov.2:6 a aseina ah, “Pathen in chihna apen, akam a hetna aphongdoh e,” ati ahi. Asimjouse Pathen in phatthei boh taken.kipaman sanna

Program highlight

- Phat hom ding : Chairman, M/Dept
- Phat lhandoh : Chairperson, W/Dpt
- Special no. : BYD
- Offering lhandoh : Hd Dn/Guest Speaker
- Message : Guest Speaker/
Pastor/Hd Dn

Mipi Taona achai ding:
Taona Item ho:-

Inam sunga

Jillai(Student) ho a ding

Jilkung(Teacher) ho a ding

Jilna mun(Institution) ho a ding

KBC Institution ho a ding:-

Dr Colvin Academy School pilhing tah asojouna ding, Hd Master

Pastor Haopu le atohkhompi Oja ho chule simlai ho a ding

Kanggui Christian College semhoija ahung umtheina ding, Principal

Mr Doulet Khongsai le atohkhompi ho a ding

Ch. Education board member hoa ding.

Amaho chu:-

Rev Onthang Haokip, Edn board Secy

Dr Ngamkhokhai Mate, Board Chairman

Pu Thonglen Chongloi, member

Rev Hemkholun Haokip, -do-

Pu Paojalen Haokip,

TAONA NGAICHAT



Ka inneipu Pu Doumang Haokip, akum 76 yrs, C/C NGV, Imphal. Tahsa damlou in kum 10 ahung kijen tan, amahi thisan lhasam, pamche theilou, kum khat sunga hi thisan Unit 12 lang kikhaiji ahin, pha chomdeh lou, Doctor hon jong anatna hiche mong ahi ti mandoh jou lou u ahin, muntin a Houbung mitheng te jousen Pathen

henga taona nei hin man peh leu chun tahsan neitah a taona jalla kainneipu in damna anei ding kinem pumin hiche KBC Thuso hi mangcha in taona ngaichat na khoh tah kahin nejje.

Pi Vahlhing Haokip, (Wife) NGV, Imphal.

Envisioning Lom Resource Centre Men Department KBC

Rev. Kaikam Chongloi

Secretary Men Department, KBC

Sermon

Introduction:

KUKI BAPTIST CONVENTION, Men Department hi 26 March 1981 kumin ahung kiphut doh in ahi. Hechi kuma pat chun tahsalamle lhagao lamin mipate khantouna ahin pepan in ahi. Tuhin hiche Department hin 50th Golden Jubilee 2031 tengleh man ding in ahung umtan, hiche kipa nikho lopnading hin Men Dept. hin lamtamta a khantou machal natoh na din ' Lom Resource Centre' akihong in tohgon

akineijin, hichu tule tua tohgon alen penna kinei khat ahi. Heche toh gon hi Men work committee 31st October 2016, kilolna no.7. na a LOM Resource Centre (Vision 2031) neidinga kiphatsah chule 36th Annual Assembly Men Department 9-11 December 2016 Lonpi khonou Baptist church KBC no.12, kilolna no.5, na a kiphatsahna tohlonin 64th Kuki Baptist Convention General Assembly 27th – 29th jan.2017 centre church New Lambulane, KBCno.1, Imphal munna kilolna no.4:64:2017 Men Department Recommendation no.5, na a kiphatsah dungjuijin ahung kipan tan ahi. Men Department in khonung dinga lunggel thuhtah kineija hiche tohgon hung kibol ahi. Pathen lungset in 15 acres

a len Gam Saitu Village, Kangpokpi District ,a akichodoh tan chule registration jong abonchan akichai tan ahi. Hiche tohgon hi KBC Men Department tohgon hita jongle Convention noiya um ahi. Hiche tohgon hi Director/in-charge, Program manager, Centre Coordinators, Research and Documentation, Finance Manager & Accountant, Office assistance, chule Cooks cum caretaker, mopohna noiya umding ahi. Convention pumpi khantouna ding thilgon ahijeh in ibonchauva hapan a ipan dinguvn ikitemuve. Tunin hiche tohgon to kisaiya paper neocha kahin sutthei jeh in Pathen kathangvah in chule Lom Resource Centre akibol lo najeh themkhat kahin tah lang nomin ahi.

Objectives of the Project

Lom Resource Centre (LRC) doi le tup pen chu ahile houbung mite, adeh'a KBC lamkaiho thepna le hetna lama training pehding chule eima le eima kitosot ding tihi ahi. Chule LRC munna hi tahsa le lhagaova phatchomna dinga lam chom chom'a Seminar, Workshop, Retreat, Consultation etc ho bolding – vetsahna in:

Gamsunga muchi phalou (kanja, kani) kitu, seminar: Igam sunguva muchi phalou tamtah akitu tan, hiche ho hin houbung nasatah in asukhan, aboi jat chom chom asodohtan ahi. Hitobang muchi kitu ho hi aphantna le asetna hilchetna a Pathen thu to kitoh a seminar bolpeh ding hi thilkhoh tah khat ahi.

Loulho (farming)lampang seminar:

Eiho thinglhang mite hi lou nato a kivah te ihuvin, itohna uva ilo lhin theina dinguva training thilkhoh tah khat ahi. Muchi tuding dan chule itobang muchi tua pha ham, ahilouleh profit le lost bou hilouva gamsunga nelou chalou ho kithopi ding dan etc. ho aphant phat a seminar pehding ahi. Government in jong ichan a eikithopi thei u ham, chule hiche a kona employment le income generate bolding dan seminar phatah neiding tihi LRC tohgon ahi.

Management seminar:

Management seminar hi adeh'a

houbung sunga lamkai (men, women, youth) ho bolpeh ding ahi. Hiche seminar sunga hi lamkai hon sum le pai hihen, kiloikhomna hihen houbung hihen, kipolkhom ding dan chule miho manage abolding dan u phatah a hilthem ding ahi. Asun ajanin kitao henlang ahin itoh khom pi ho toh kikitoh hih le ipi aphatchomna umding ham? Thil jouse abol ding dan umsoh kei ahi. Itoh ding, iseiding, ibolding, kibolda le lolhinna umlou ding ahi. Hijeh a chu tao jong taoding chule sei jong seiding ahivanga aboldan aseidan thep ngai ahi. LRC hin hitobang seminar bolding hi thilkhoh tah a kigel ahi.

HIV/AIDS seminar:

HIV/AIDS natna hi asang cheh cheh in, mi tampi hinkho atongkha tan ahile hitobang natna hi mipi ahi adeh a khangthah ho awareness pehding ahi. Aphatcha a akipeh louleh hiche sanga khohjo ihin to nah lai dingu ahi. Hijeh a chu hitobang seminar ho neiding ahi. Chule hiche seminar a hi sex education, abortion, etc ho jong kiseitha ding ahi.

Damtheina Seminar:

English thuchih in "health is wealth" atibanga damtheina hi thupi tah ahi. Damtheina dinga seminar aphant phat a gon ji ding hi LRC tohgon khat ahi. Damtheina hi neh le chah chule mihem lungput a kon chule adang dang tampi akon in akiseiyin hitobang ho hetlouva khoh tampi hetna

dinga seminar bol jingding hi LRC tohgon ahi.

Houbung dangtoh Pathen na tohkhom ding thu:

Khantouna le machalna hi mi khat sanga mi tampi akon ahi. Tahsa le lhagao lama jong mi tampin tha asekhom teng lolhinna sanga ahi. Chule mihem koima achanga lhingjoulou ahi. Ahithe channa tahsan kibahpi hotoh Pathen natoh khom ding ahi. Hijeh a chu Manipur hihen, Northeast hile eima houbung keo hilouva itahsan kibahpi (Christian), hotoh phattah a pan lahkhom a Pathen na tohkhom ding ahi. Hijeh a chu Pathen na tohkhom ding dan le kiloikhom ding dan seminar jong bolding tihi ahi.

Natoh (career) lampanga seminar:

Khangthah themjil ho dinga Pathen thu kitoh a natoh kilhending, Pathen thu to kitoh inatohna a pan lahding, Pathen lungdei lama hinkho manding. Hitobang ho dinga seminar gonpeh ding ahi. Khangthah te tulai social media le games in nasatah in alungthim

u alamangin aphot chaa akisem loule khonunga manthei hilou dingu ahi. Khonung ding hinkho gelna a aphot chaa seminar peh jing ding hi LRC doi le tup khat ahi. Khangthah ho vetkol ding dan jong hi nu le pa te hil angaiyin ahi. Nu le pate a dinga jong khangthah te psychology hetna dinga seminar bolpeh ngai ahi. Ahithe channa khangthah ho thepna lama career choose kibol sah ding aphot. Alunglut naova akipuihoi le lolhinna sangtah anei dingu ahi. Hiche nule pate agelphalou jong aumin, amaho dinga seminar hi thupi tah ahi.

Consultation:

Kivaihomna kiti hi mikhat lunggel sanga mitampin lunggel ahinsekhom teng lolhing ji ahi. Chutobanga chu mipin lunggel asekhom hi kivaihomna a thilkhoh tah khat ahi. Kiloikhomna khantou hen itile aphot phat a consultation nei ngai ahi. Tulai vannoi a akhangtou jouse thusim ivetle consultation ha bol jing ho ahiuvin ahi. Hijeh a chu consultation hi LRC muna boljing ding ahi.

Facilities/Structure of the Project

Lom Resource Centre sunga umding phabep ho chu ahileh Auditorium, (Jubilee Hall) mi sangkhat (1000) tobang touna theiding.

Guest House:

- (a) AC Room nga (5), hichea chu washroom khatcheh umding
- (b) None AC Room som (15) hichea chu washroom umding.
- (c) Sleeper Room (None AC), hichea chu lupna 100 – 200 umding.

3) Training Block

(a) *Training Hall khat*(b) *Meeting/Seminar bolna ding Hall thum: Hall khat (1) mi 100 tobang touthei ding chule Hall ni (2) mi 50 tobang cheh touthei hiding ahi.*(c) *Mini Conference Hall khat koiding.*(d) *Library le lekhasimna ding chule computer room ding khat.*

4) Kitchen le Dining Hall: An hona le nehna ding thupi tah khat umding

5) LRC sunga community ho dinga

(a) *Football Ground*(b) *Volley Ball Court*(c) *Ten Prayer Cabin*(d) *Garage*(e) *Demonstration Park/Garden*(f) *Plantation*(g) *Staff Quarter*(i) *Vermi Compost*(h) *Piggery & Poultry farm etc.***Indirect Beneficiaries**

Tukhang hi kitetna khan ahitan iloi ipai phahna dinga sum tampi pi kisenga chihna le thepna kikihol ahitai. Mi bangkhat chu avang apha in sum le pai aneyun ajil nom nom ajiltheyyun chule gam chom chom'a thepna le chihna akihol theyyun ahi. Ahin eiho society hi economically lhinlel, neilel ihuvin hijeh a chu LRC hin avaicha agenthei chule munchom a che joulou ho dinga aphatchomna tei dinga kigon ahi. Migama themjilna thupi tah tah tobang igam sunga aumding hi LRC doi le tup khat jong ahi. Lom Resource Centre akon phatchomna muding ho chu ahile:

KBC houbung ho (local le gambih):

KBC houbung mite mun tina umho dinga manbai tah le kilemchang tah a aphatchompi dinghi doi le tup khat ahi. Local church, gambih chule centre church ho alolhin le convention chu achamlouva lolhing ding ahi. Hijeh a chu houbung miten aphatchompi masatpen ding ahi.

Manipur sunga Pathen thu lama kiloikhom chom chom ho chule Northeast India gam-sunga houbung hiding ahi. KBC houbung keo hilouva ahitheichanna northeast langa seminar neinom ho jong mun kipe ding ahi. Amaho jong nasatah a aphatchompi dingu ahi.

Manipur gamsunga mission na-tohna mun ho le Pathen thu japhalou lai hon aphatchom pi dingu ahi. Ajeh chu LRC a hi mission strategy lam chom chom seminar chule consultation kineiding ahin, nasatah a aphatchom pi dingu ahi.

Manipur sunga cheng jat le nam chom chom hon jong aphatchom pi dingu ahi. Lolhinna dinga tohkhom seikhom chu pankhom hi thupi ahitan. LRC in hitobang tohkhom ding le pankhom ding dan thu seminar habol a kibol ding ahi. Hichun eima houbung bou hilouva houbung dang dang kiloikhomna dang dang in jong aphatchompi ding ahi.

CSO (Civil Society Organizations) Jatchom chom hon jong aphatchompi dingu ahi. Ajeh chu LRC mun na hi Seminar, Workshop, Meeting jatchom chom,

tahsa leh lhagao lamma khantou nathei, phatchom na thei ho jong mipi te ading nga abolthei chan in aboltheiding ahi e.

Conclusion

LRC hi KBC Men department tohgon hijongle Convention a ahin, mijousen pan ilah dinguvin ikitem uvin ahi. Men department te bou ingenseu le ilolhin lou dingu ahi. Khatcheh in "keima kapoimo e" tia ilah soh kei diuvin ikitemuve. Pathen lungset jal in gam ichodoh taouvin chule Apa, Acha Lhagao Theng minin jong ilhandohna taovin, tua hi LRC plan project ho kipan ahitai. Sum le pai tha le jung hatah a ngaichat ahijingin. Hichea hi ibol thei chan ibol uva LRC doi le tup imol so tei nadiuva pan ilah khom soh kei diuvin Pakai minin ikitemuvin ahi. LRC hi eiho a ahin phatah a ikisem dingu ahi.

Tohkhompi Thah



Aum talou Rev. Seikholet Singson, (Founder KBC) tupa Mr Letjakai Singson in 1st August, 2019 nikho hin KBC Worker khat hina a tong khom dingin joint ahung bol tai. Pathenin ama le ainsung mite jong maban a phat thei bohjom jing henlang, Pakai le KBC a dinga hattah le tomngai

tah a tong jing dingin ikipa pinao toh lhonin achunga kipa thu ahung kiphonge.

Paul's life and ministry for Christ.



1 Thess.2:5-8

Rev. Ngamjapao Haokip
Pastor, Gambih No. 13

Sermon

Hiche lai Bible chang isimdoh naova kon na Paul hinkho le akiman chah na hophum in kahin khen in ahi. (1) Vss, 5-6, sung chun ivet leh , His faithful stewardship, tichu;Thutah le thudih tah'a Pakai lhacha na atohna akimun ahi, (2) Vss, 7-8, sung chu isim leh, His humility and great caring (Aki ngainem na le ami khotona) akimu theijin ahi. Anoija point phabep ana veu hiute.

1. His faithful stewardship.(Thutah leh kitah'a lhacha na atohna), Paul hi Christa'a amopohna le atoh dinga lom ho'a imatih chan in alosam

khapoi ti kichen tah in akimun ahi. Vetsahnan :- Even in a time of persecutions, and in Jail, He was faithful to God, and when he was put in a Jail he praise God and preached the Gospel.

Illustrations: Masang lai chun Pathen thusei hon, pulpit dunga keima mihinan nei vehih'un, chuleh keima michonse, ilah'uva ahat lel pen leh alhasam pen

kahibouvin,hijeh chun pathen thu joh chu thupi ahi tin anasei-jun ahileh ana kingainom ma ma in ahi, ahin tulaijin hiche seiho chu koiman athusei angai nom peh tapon ahi. Tulai paolam leng khat chu, Koigham khat in La ahin sah kon leh a awgin na ngailouvin, athuchang joh in ana ngai jiute iti ji'un ahi,hiche jong chu sei angaipon ahi. Lamkai khat in

hitin aseijin ahi; " Kasei hohi bol un lang, kabol hohi jui hih un" atin ahi, ajeh chu ama pa chu mi thutah hilou chule ase pet chalou mi ahi.

2. His humility and great caring.(Akingai nam na leh amikhoto na). Leiset mihem te lah' a hin ivetna ahileh kineosah kitihi ahahsa pen khat chu ahi. Chule eima phatchom na dinga chun miloi khat hin kineosah jong abol thei thouvin ahi. Chule caring kiti "khohsahna" or "panpina" kiti jong hi mihem a dinga ngaichat pen khat ahi. Eima phatchom na dinga kineosah chu kineosahna dih chu ahipoi. I-bol'a Paul in ama hinkho chu numei/ nupi hon achate akhohsah dan toh atekah ham? Ajeh chu aman Houbung ho chu thi changeija dinga ngailutna nei dinga ahinkho akipeh dohna pa chu aseina ahi. Chule nupi cha nei khat chun acha chu ahung ka seh leh, agilkel seh'a anao an na avah ding chu koima sei ngailouva akihet jeng banga chu Paul in jong Houbung mitheng te dinga ahinkho pumpi chu afeh doh jeng ahi.

3. Loving kindness.(Ngailut leh lungsetna). Hiche loving kindness kiti thuchang hi eipaova seidinga chu ngailut lungset iti diu ham, hichehi Pathen gun(quality) kipon na khat ahi. Ajeh chu Pathen chu ngailut ahi tia ihet'u ahi.(1 Jhn.4:16b). Ajeh chu ngailut kitihi Pathen natoh (activities) kihetna

ahin, hijeh a chu ngailut hi Pathen na hung kondoh ahi. Paul in hitin aseijin ahi ; " Tun tahsan kinep chule ngailut aum in hicheng lah'a chun ngailut hi achungnung pen in ahi," ati(1Col.13:13). Ngailut means (action, natoh) Houbung means kipehdohna, kipeh thengna. Houbung chu akipehtheng jeng'a chu Pathen in alungsetna angailut ding, chule aventup ding ahi. Hijeha chu eihon jong ngailut na leh lungsetna hinkho inei jing,u angaijin ahi.

Conclusion: Mitheng Paul in a ministry'a achepi chu "Thutah, kineosahna, mi khohsahna, chule ngailut, lungset leh mihepina hohi ahin, hijeh a chu aman hangsan tah a thu ase thei ahin, chujong le kichatna lungthim jong aneilou ahi. Aman ase khat chu ahileh :- (i) Looking backward, (ii) Looking upward, and (iii) Looking forward,(Phil.3:13,14; 2Tim.4:6-8). Hijeh chun sopite ho, eihon jong i-hinkho'u achesa phat a chu Pathen lunglhai ding hinam tia kigel angaijin, chutoh kilhon na chunglam ve jing pum'a ti chu Pathen lam kat jinga hinkho man angaijin, chutengleh malamno'a Christa Jesua dinga na tamtah tong dinga kalson angaijin ahi. Tunin nangin jong itobanga hinkho naman na Pakaiya dinga na ijat natoh doh hinam tin kigel tem in sopite. Pathen in asim jousea dingin phat thei iboh peh tao hen, Amen.

Mission Column

LAOS

MISSION FIELD REPORT

Achesa 2014 kum a pat in Pathen mapui najal in Laos gam a Pathen lenggam na etoh nao amachal jingin ahi. Laos gam ahi direct Church Ministry ahi theilou jeh in, school/teaching Ministry in ina lut uvin tuni changei in Pathen ma puina le houbung miten nei taopeh naojal in Ministry jong olol in kamachal jinge.

Laos gam ahi atamjo school ministry ahi jeh in, chapang ho toh aki kimangcha khom in school a English class mangcha'n Bible Thusim



leh Gospel laa ho akihil jin, chujong le Bible Chang ho jong abung achang jaosah lou in athu seh2 akihil in aki recite(sei) sah jiuvin ahi. Chuleh buneh kon hi hen nehthei neh kon hijong le Taona man dan kahil uvin ahi. Chapang ho toh kiman chah seh hilou in, Ka school nei Pa, Mr. Enoch Cha leh a Jinu Madame Deborah Makai nanoi in Teachers hotoh jingkah seh le Devotion kana nei jing uvin, achesa 21st December, 2018 chun ka school teacher hou mi 6 Baptisma ana chang uvin ahi. Tuhin ka school teachers(Oja) hou innsung mite Pathen thu a puilut theina ding in ka school teacher hou kaki thopiu vin kamakai uvin, insungmite Pathen thu a kihoulim pi di dan le pui hui ding dan kahil jiuvin ahi.

Hiche school ministry ahin houbung mipiten neitao peh nao le Pathen lungset najal in, katoh khompi ho lungsetna le ka school neipao

tahsan na kachang in, hijeh chun ka school Director pao in kumkhat sung amakhel a school vetup ding in mopoh na eipe in ahi, ajehchu school neipa leh a insung mite hi Sabbatical leave dia kumkhat Korea a cheuva ga umdiu ahi. Achesa nisim 1st July, 2019 akipat chun School hi kei mopoh nanoi a aum in chuleh ka inn lo namun apat in school mun a kaki chon lut in, ka school neipateu inn a ka um in ahi.

School ministry seh hilou in church ministry jong K.B.C. lamkai ho phatsah toh kilhon in TCM Grace Church kana join in, ama ho lamkai nanoi in Outreach Ministry ho jong kana neikhom jiuvin ahi. Outreach ministry ka chejiu namun hi kei ho umna mun a pat pung kal 9 bus lampi kajot jiuvin ahi. Laos mun ahi Outreach ministry hi tijat umtah ahijeh in kumkhat le 2/3 veibou aki chejou ji'n ahi. Ka outreach ministry uva kon in khangdong mi 10 in Pathen ana ki san uvin, Ama hohi tu le tua University a lekha sim lai ahiuvin, ama ho toh kaki mangcha khom jiuvin, kum 2 sung houinn khat a 'Lao' paotoh English pao mangchan kana kikhom khom jiuve. Pathen lungset jal a ka machal jingu toh lhon in a chesa June 2019 nia pat chun ama ho dingin atum beh in Lao Grace houinn tin, Dongdok University mun a raw house(inn ong) neocha kalo uvin Pathen niseh le ama ho lamkai nanoi in kikhop khomna kanei jiuvin, ama hotoh kiman chahdan vesui kaki lhah jiuvin ahi.

Taona Ngaichat

Laos gam a Pathen natoh na amachal jingthei nading in houbung mite na taonao kangaicha jinge.

Tu le tua School kei mopoh nah a aum hi mihem aki hijeh in lhahsam na tamtah kanei in, hiche kumkhat sunga ema boina umlou a ei kinsan na kajo thei nading in na taonao kangai chan ahi.

Ka school neipa umlou jeh in, ka school uh secretary nu toh kitho in, school teacher ho Pathen thua kapui hoina hon a kilung toh tah a kapuihoi jing theina lhon din natao nao kangai chan ahi.

Achesa May lha a chun ka Outreach ministry bolna mun uva um Filipino Couple(nupa) khatchu Laos Government in ana no doh un tuhin Philippines gam a ale che hon tan, ka ministry u jong a chejom thei tapon, hijeh chun ka ministry uh kasut jom thei nadiu vin Houbung mite hon neihin taopeh jing diuvin kahin tem jing uve.

Sherlyn Lhingpineng Khongsai
Missionary to Laos

Mission Conference 2019

adia kigot na che lhajing

Ahung lhung ding 14-18th November 2019 sunga Kangui Christian College Campus Kangpokpi muna KBC Mission Conference kibol ding to kisai jin kigot na achelha jinge.

Conference munding ground levelling akibol chai to lhonin houbung ho atamthei pena ahung pan uva Pathen thua ikikhou khah na diu program hi alohin theinadingin Mission Board kichol nga lou hellin akikalsong jinge. Mission Board Group thum in akikihom khen in Conference kaha houbung atamthei pena viltei ding toh gon akinei je. Lhakhat sunga Sunday ni hi Gambih houbung ho vilnan akinei jin jingkah nilhah in houinn kaina program akinei jing in ahi. Gambih sung houbung Deacon Board ho kimu pi na akinei jin ahung lhung ding program chung chang kihetsah to na akinei pi jin ahi. Tuni chana atha hintoh doh a chule aphot mantam tah hinpejing Mission Board member ho chungajong kipa thu seilou thei ihi pouve.



Sumlepai lama alhah sam lou nadin Conference share jochana pedin houbung ho temna akinei jin sumle pai tohdia kigong houbung hon kipah tah a pan ahin lah na banin anakijih doh lou houbung phabep in jong kipah tah a sumle pai hintoh jong aume.

Tuchung Mission Conference hi hamle pao kile lou ding ahijallin houbung mipi te akipah atam lheh e. Speaker teni lah a Rev Kh. Khajakham hi achesa 1989 kuma Mission Conference United Sapormeina muna inanei naova main speakera anapang peh ahin kum 30 lhin na a avella ama Pathen thusei dinga ikou thei kit uva chule amajong hung kit dinga akigot thei kithi kipa um tah ahi.

Hiche Mission Conference hi kipah tah le thanom tah a ibol doh uva khangdong tamtah dia Pathen natong dinga koulhen achan na mun ahung hia chule houbung miten Mission na itoh nao athah tah



a kitilkhouna munle Pathen nadia kibil phuna Conference ahung hithei nadin itao naovah anagel doh jingu hite.

KBC Mission family mi khat ikibe taove.

Achesa nisim 19 Aug 2019 nichun RIMS Hospital Imphal a Evangelist Bijay Ghatani le aloinu Ms Premi in damselin chanu hoitah khat ananei lhon tai. Hiche naosen hi damsella ahung khan let na nikhat le anule apa kipana chule Pathen a dia kipana chanu pha ahung hina din houbung miten itao nao vah anagel



doh u hite. Amanihi tule tua Chingmeirong KBC Mission field a mopo aihonin ahoubung hon jong akhantou va amachal jing nadin Pathen henga taonan anagel doh jingo hite.

HETSAH LE TEPNA

34th Council Men Department kilolna no.4.34.2019.

39th Annual Assembly 2019 leh 2nd Gospel Olympic hi Lom resource centre mun na bolding, Gambih jouse Camp ma lhungsoh keiding ahi je in, Camp chungkhu na ding Turpaulin ahinki poh cheh ding ahi e.

Aphat hi 3rd – 7th, December 2019 sung hiding chule 3rd December 2019 ni 11: am leh lhunkim soh kei ding 11: 30 am a opening program kipan ding ahi. 7th December 2019 ni leh closing programe umding akichai chai leh kikhen ding ahi e.

LOM RESOURCE CENTRE

Ahung lhung ding 15th September 2019 ni hi Lom resource centre day ahi jeh inna man cheh uva eima eima Houbung in Programme anop na thei chan na e kigon dio vin kahin tem uve.

Chule offering jong LOM RESOURCE CENTRE Panpi nading a ibolcheh dio vin kahin hetsah uve.

TAONA A GELDOH DING HO:

- i). Lom resource centre Managing committee ho ding.
- ii). MEN Work committee hoding.
- iii).Chawkidar or Caretaker pu ding.
- iv).Lom resource centre toh gon ho lolhin thei nading leh a khantou amachal thei nading.

Secretary
Men Department

BQ

EXAM CENTER

Kumseh a ana kiboljing banga tukum jong Youth Department in noiya BQ hi chelha kit ding ahitoh lhon a KBC sunga Houbung tampi Exam Center a kineijousen jong nisim 13 October 2019, Sunday nikho nidan 10:00 AM apat 1:00 PM sunga BQ exam hi neibolsah kitdiuva taona le temna kahin neijin ahi.

Hiche lolhin nadinga Gambih le Houbung hoa Youth lamkai chengin jong ina boipi jing uva pan ina lahkut diuva Pakai min a temna sangpen kahin neijin ahi. Exam hojong koima phun naloudia kituptah a ina bolcheh diuva temna jong kahin nei ahi.

YOUTH CONNECT 2019



YOUTH CONNECT A KOUNA

Pathen in damna phatpha eipeh uleh ahunglhung ding nisim 3-8 October 2019 sungle Khumanlampak Stadium, Imphal, Gambih – 1 mun'a Youth Connect umding ahitan, muntin a KBC khangthah jousen hiche hi eiho kigon, eiho kin ahijeh in thanom tah'a pan ihunglah cheh diuva temna le kouna ahung kineijin ahi.

Hiche Youth-te kingon a hi nilhah sehleh Pathen houkhom nale item jatjat kibolna ding ahitoh lhon in KBC sunga nulepa pilepute jong neihung lhahpeh diuva kouna jong kahin nei uvin ahi.

KBA Nagaland Youth hotoh kin kineihi amasapen hiding ahijeh in amaho jong Association neocha ahivangun thanom tah in mi tampin pan ahunglahdiu ahin amun a um KBC Youth ten jong thanom tah le kipah tah a kigotna inei uva ihung lhah chehdiuvin temna ahin ki-neiye. Youth Connect hi tahsa lam le lhagao lam'a kitilkhouna kineina ding kingon ahin, thanop umtah thil tampi jong kibolding ahi.

Hetthei phabepho chu:

- ◆ Nilhahseh a Pathen thua khangdongte lung suthou thei kitilkhouna jong speaker michom chom a kon umding
- ◆ Kaikhom hoa jong Nungah le Gollhang Officer inei houva kon'a jong khangdongte tilkhouna dinga Motivational Speech umding.
- ◆ Gambih jouse a kon a Pathen vahchoila ngeitahtah kisahna umding.
- ◆ Nungah-gollhang talented tahtah hoa kon'a jong a talent u vetsahna umding.
- ◆ KBC Youth President ana pojouse le KBC Youth Secretary ana pangsa jouse jong hunglha cheh diu, kipapina kinei ding.
- ◆ KBC sunga Pathen vahchoina a ana kimang milui le mithah KBC Gospel Zaitthem jouse jong kipapina kinei pehdng.
- ◆ Upcoming KBC le KBA Gospel Artiste hoa kon a jong Pathen vahchoina umding.
- ◆ Pathen hengah tao pum in pan lauhitin, damsella aphot le nikho imunadiuvin jong Pathen hengah taonan geldoh jing ute.

KARBI-ANGLONG YOUTH CAMP

Pathen panpi na jallin Karbi-Anglong Youth Camp hi lolhing tah in ana



kichaitan ahi. Hiche kingon lentah boldoh nadinga sumlepai hintoh, changval jouse chungah kipana sangtah akineiyin, nangho jouse jallin Pathen thangvahna akipen ahi. Sumlepai nahintodoh naujouse

jallin Pathen in phatthei naboh jing tauhen. Pan ilahkhom nau kidangtah khat ahijeh in pan hinlaho Pathen in jong nakiphalnao nahetpeh mai uhen lang a phattheina nachan jing tauhen.

Hiche kingon a chun mopohna dollin Convention Youth lamkai chengjong kikimdellin ana kalsong uvin ahi. Hiche Youth Camp a kimanchah dan anoia hin report chomcha kahin pei.

Speaker in Rev. Lettinlal Chongloi, Pastor, C/C Molnoi Area ana pange. Devotion Leader in jong Rev. Lunjalen Khongsai, Gambih 5 pastor pa ana pange.

Camp Director in Gl. Hahao Haokip, KBC Missionary ana pange. Pastor Seminlen Haokip, Gambih 18 pastor pa jong ijakai vetup sutup in ana pangin ama chungah kipathu akiphongin ahi.

Convention Youth lamkai chengjong thilcho len akipangin chule Camp chainin jong Khangdongho tilkhouna le tahsa lam a lekhasim lang thudol in jong Camper ho chu class ana neipiuvin ahi.

Hiche Camp a chun pasal 53 le numei 34 in pan alauvin, amaho lah a chun Christa kisan ah jong tampi ana umuvin Pathen thangvahna ipeuvin ahi.

KBC YOUTH DAY

Tukum KBC Youth day nisim 6th October 2019, Sunday nikho hi Youth Connect sung ahung hitah jeh in KBC Youth-te tampi Youth Connect a kimangcha ding hijongeh KBC Houbung jousen jong hiche KBC Youth Day hi kituptah a Gambih Houbung jouse le Centre Church Houbung jousen neinit peh diuva Pakai min a taona le temna kahin neiin ahi.

Youth Connect a hung kalsong chengin nisim 6, October 2019, KBC Youth Day hi kimang khomding ahitai. Hiche nikhoa kingon umding dan chu:

Gambih Choir jouse "Niloupi Khat Imutaue" la sah kitetna ana umding.

Choreograph/Melodrama jong Gambih jousea kon a kitetna ana umding.

KBC Gospel Zaithem jouse kipapina kin umding.

KBC Youth President le Secretary ana pang jouse kipapina jong ana umding.

Khangdong ho chihna le thepna lampang le lolhin nadinga tilkhouna jong ana umding.

Literature Column

Convention Level

Sunday School Competitive Examination -2019 & New Testament Bible (Scripture) knowledge Competitive Examination -2019

Hiche chung changa hetsahna lekhatot hung kisol masa ahéphalou itam met mut nah lai jeh-uvín ihet soh teina diúvín lekhatot avela ahung kisol kitna chung chonin hiche KBC Thuso a hin avelin ahung kitah lang kit in ahi. Khoh sah tah a anasim a anahechêh ding le asimdo h on hetsah ding'a lomho anahet sah tei dingín avelin Pakai minin temna ahung kineikit in ahi.

Senior 1, Senior 2, chule pilhing class ho kumlhun Convention Level Sunday School Competitive Examination - 2019 le New Testament Bible/ Scripture Knowledge Competitive Examination 2019 ding thu'a avel'a hetsah'na.

Sunday School Exam.

- i) Senior 1 : Bible Pumpi Thumakai, by Rev. Onkho Haokip
- ii) Senior 2 : Christian te Tahsan Kihilna, by Rev Silas J. Haokip
- iii) Pilhing : John Henga Thuphondoh (Revelation), by Rev. Haoneo Haokip

N.T Bible (Scripture) Knowledge Examination: Mathew to Revelation (Theological background ho pang louva Bible Text a kon'a bou kidong ding)

*Exam teni nikho : 1st December, 2019 (Sunday)

(Session 1 - Sunday School Exam. Session

2 - NT Bible/ Scripture Knowledge Exam).

*Application form submit bolna phat ageipen'a 30th September, 2019

(Tu hi Application Form akilha jing lai ahi).

Application form man

- i) Sunday School Exam form Rs. 100/- (Rupees one hundred) only
- ii) N.T Bible (Scripture) Knowledge Exam form man Rs. 100/- (Rupees one hundred) only

* Sunday School Exam bouva pang ding hon Sunday Exam form bou (Rs. 100/- a) akilah diu;

N.T Bible (Scripture) Knowledge Exam bouva pang ding hon N.T Bible (Scripture)

Knowledge Exam form bou (Rs. 100/- a) akilah diu;

*Sunday School Exam le N.T Bible (Scripture) Knowledge Exam (ani) a pang nom hon ani'a ding'a form 2 (100+100=Rs. 200/- a) akilah ding.

Exam Centre

1. Imphal, 2. Sapormeina, 3. Chassad (Kamjong Dist),
4. Churachandpur 5. Sugunu, 6. Pallen Molnoi, 7. Moreh

(Exam centre hi nangma hitheina pending mun nakilhen ding ahi)

Application Form lah'na ding

1. KBC Office :

- i) Rev Haoneo Haokip, Secretary, Literature & Publication
- ii) Ms. Nenga Singson, Clerk, Receive/ Receipt & Issue

2. Eima tah Office'a ihung jou/ man loule application form man ihin peh'uva gambih pastor/gambih lamkai/ houbung lamkai/ Office hung pha thei/ nganse theidang dang ihin nganse theiyu ahi.

* Sunday School themvet'na hi niengkum/ kum masa (2018)'a bang'a houbung'a kon'a gambih, gambih'a kon'a Convention Level pa chu hitalouva, koi hile Convention Level Exam a pang nom chan'in mun aneitheina ding'a apang nom chan'in Application form akilah'a direct'a apply abol'a pang thei ding'a kigong ahi.

*Hiche Exam teni'a ding'a Application Form lah'na ding le submit bol'na ding phat kipe (ageipen'a 30th September, 2019) kichai nung'a apply bol phal hitalou ding ahi; ajeh chu, phat kipe sung'a submit hinbol ho'a ding'a bou question kitem/ kitat'a kigong tup ding ahitai. Hijeh chun, apang nom jousen phat kipe sung'a hi application nakilah'uva na-submit cheh diu ahi. (Application form a apply bol lou Exam a pang thei lou ding ahi).

Hiche thu hi gambih pastor, gambih lamkai, houbung lamkai, Sunday School superintendent, Sunday School jilkung hihen koi hijong le'uhens hetsah ding'a lom (Senior 1, Senior 2, chule Pilhing class) ho thonlouva phatah'a inahet themсах teidiuvin Pakai min'in tem'na ahung kineiyn ahi. Adeh in toh khompi gambih pastor ho'n gambih houbung tour ibolna'uva lekha hi ikipoh'uva houbung tin'a inaphondoh/ inalhang sap cheh diuvin Pakai min'in ikitemuvin ahi. Hetchet theilou thu'a kihet to'na thei contact No. 9089593092/7005525033

Literary Meet - 2019 Report



Pathen lungsetna jalin tukum (2019) sunga dinga toh gon ho lah a Literary Meet - 2019 chu achesa 10th August (Second Saturday), 2019 nichun Centre Church, New Lambulane, Imphal, KBC Gambih No. 01 mun'ah lolhing tah le nom tah in anakimang tan ahi. Ikiloikhom nau KBC ngailutna le Organizing Committee (Literature & Publication Committee) tosotna a, gelkhohna neitah le pontho tah a kin a hunglha Convention lamkaiho jouse le ahung kikhom mipi ho jouse, Competition Items hoa tomngaitah a pan hinla Competitors ho jouse, ahinkilhonpi Gambih Pastor ho, Gambih lamkai ho, houbung lamkai ho le insung mite jouse, Competition hoa Judge a eipanpeh hou jouse, Programme tolna a pan laho jouse, chule Host Church (Centre Church, New Lambulane, Imphal) houbung lamkai ho le houbung mipi jouse chung a Organizing Committee in Pakai minin kipa thu seijou lou khop in ahung kiphongin ahi.

Kitetna Result ho

Mili Lasah (Quartet)

- First : Gambih no. 04
Second : Gambih no. 01
Third : Gambih No. 03

Sunday School Icon

- First : Miss Lamdeiching Touthang, Gambih No. 03
Second : Mr. Seigoulal Kipgen, Gambih No. 01
Third : Nengngaithem Singson, Gambih No. 04

Choreography

- First : Gambih No. 01
Second : Gambih no. 04
Third : Gambih No. 09

N.T Bible Quiz

- First : Gambih No. 03
Second : Gambih No. 09
Third : Gambih No. 04

Essay Writing

- First : Satkholen Haokip, Tuinom, Gambih No. 09
Second : Letkhotong, Leijang Khopi, Gambih No. 08
Third : Henkholam, Tuinom, Gambih No. 09

Poetry Writing & Recitation

- First : Tingjoujam Haokip, Tuinom, Gambih No. 09
Second : Thangminlun Haokip, Kholep, Gambih No. 04
Third : S. Veineihoi Haokip, C.C, Langol, Gambih No. 01

Painting

- First : Ngamboigin Vaiphei, Pangjang, Gambih No. 03
Second : Laldeikim Doungel, C.C, NGV, Gambih No. 01
Third : Lenlunsang Khongsai, Kulbung, Gambih No. 09

Extempore Speech

- First : Jenifer Gangte, Gambih No. 08
Second : Lhingneineng Kipgen, Gambih No. 03

Third : Nengpilhing Kipgen, Gambih No. 02

Gambih-Wise Position

First : Gambih No. 09 (Over-all Champion)

Second : Gambih No. 01, 03 & 04

Third : Gambih no. 08

Bible Pumpi (Genesis to Revelation) Thumvei Simchai Masa Kitetna Tukum (2019) sunga Bible pumpi (Genesis to Revelation) Thumvei simchai masa kitetna anakibol chu Literary Meet kibol chan'a simchai jouse kipa man (1st - Rs. 5000/-, 2nd - Rs 4000/-, 3rd - Rs. 3000/- chule adangse Consolation Prize Rs. 1000/- cheh) peh ding anakiti dungjuiyin Literary Meet chan'a thumvei simchai anoiya minchong chengse hi kipaman anakihom doh tan ahi.

Rank	Min	Houbung	Gambih No.	Asimchaina
1st.	Shongjangam Haokip	C.C, Molnoi Area,	16	13th April, 2019, 8 pm
2nd.	Khupneichong Kipgen	Solam Kmc	05	14th April, 2019, 7 am
3rd.	Sekholun Baite (71 Yrs),	Phaimol	17	31st May, 2019, 4 pm
4th.	Letkhai Baite (72 Yrs)	Thingbongphai	11	10th June, 2019, 1 pm
5th.	Nengjoujam Zou,	Kuraopokpi	16	23rd. June, 2019
6th.	Hatneikim Haokip	S. Saheibung	07	28th June, 23019, 10 am
7th.	Jangpao Haokip	C.C, S/Sapormeina	04	5th July, 2019, 5 pm
8th.	Letkholen Haokip	Saijang	03	6th July, 2019, 6:30 pm
9th.	Jamkhomang	Kotlen	06	8th July, 2019, 8 pm
10th.	M. Lhunkhopao	C.C, NGV	01	17th July, 2019
11th	Jamkhotong Haokip	C.C, Sangaikot	11	7th August, 2019
12th.	Zilkholun Haokip	Leijang	11	9th August, 2019

Kipapina jal a Pakai Min a Kipaman Hintohdoh ho

1. Pu Seiminthang Misao, Centre Church, Kangpokpi, First Prize - Rs. 5000/-
2. Pi Chinneivah Haokip, Moreh Baptist Church, Second Prize - Rs. 4000/-
3. Pu Letkholun Haokip, Centre Church, Salem Sapormeina, Third Prize - Rs. 3000/-
4. Pi Hechong Haokip, KBC Book Room, Consolation Prize - Rs. 1000/-
5. Pr. Henkholen Kipgen, Development Co-ordinator, KBC, Consolation Prize - Rs. 1000/-
6. Pi T. Chongboi Haokip, M. Thingjabong haosapi, Consolation Prize - Rs. 1000/-
7. Pi Nenem Haokip, Centre Church, NGV, Consolation Prize - Rs. 1000/-
8. Pi Nemo Kipgen, Centre Church, NGV, Consolation Prize - Rs. 1000/-
9. Pi Dorothy Kipgen, Centre Church, NGV, Consolation Prize - Rs. 1000/-

10. Pi Lamhng Doungel, Centre Church, NGV, Consolation Prize - Rs. 1000/-
11. Pi Nengcha Doungel, Centre Church, NGV, Consolation Prize - Rs. 1000/-
12. Pi Hatlhng Doungel, Centre Church, NGV, Consolation Prize - Rs. 1000/-
13. Miss Louis Kilong, Centre Church, New Lambulane, Consolation Prize - Rs. 1000/-

Chunga minchong ho cheng hin kipapina jal a Pakai min a ahung kiphah doh jaluva Bible pumpi thumvei simchai ho kipaman (Prize) hop doh theiya aum jalin achunguva Pakai minin kipa thu seijou lou khop in ahung kiphongin ahi; Pathenin ajat jan phat thei boh tauhen!

* Prize hop nia anakilah man louhon natahsa tah uva Literature Secretary kom'a nahung kilah man loudiu jongle alah peh dinga alathei mi khat ahiloule nagambih Pastor pau nahin nganse theiyu ahi.

Kipa Thu le Kitilkhouna

Bible pumpi thumvei simchai kitetna'a No. 1 (First) pa, Pu Shongjangam Haokip, Centre Church, Molnoi hi Area kitetna ding gunset mai maiya pan alah mai mai hilouvin, apenthah nikho'a pat'a Pathen thu/ Bible hi ngalutna neitah'a, phatah (regulal tah) a ahinsim jing'a, hitia chu Bible pumpi hi vel somthum (30 times) ahin simchai ahitan, tukum (2019) sung'a ding'a thumvei simchai masa kitetna'a jong pan ahinlah'a, January lha'a kon'a 13th April, 2019 sung'a thumvei asimchayia simbe talouva um hilouvin, a-Bible sim ajom jing'a August lha chan'a hi Bible pumpi ngavei (5 times) asimchai ahitai. Hitia Bible sim hi achepe/ aboljom jing ding ahin, achutile Pathenin damna hinkho apeh sung'a hi Bible pumpi hi vel somthum keu hilouva vel somli/ somga beh ahin simchai teiding tina ahi. Kipapi umtah ahin, Pathenin damsotna hinkho pehen lang, hitobang hin pontho tah in pang jom jing henlang, midangho dingin jong Pathen thu/ Bible simna lam'a kitilkhouna phatah in hung pang jing taken.

Rev. Paokhohao (Haoneo) Haokip
Secretary, Literature & Publication, KBC

IPI NAGEL EM?

-Evan. Helun Chongloi

Tulajia Khamnathei Aleibol le Ajohho chungchanga Aga kimuho

A PHATCHOM NAHO :-

Ina neikhahbehlou u

- => *Sumpun muna/Neina,*
- => *Aleilhobai, (Hampa lou ikaple).*
- => *Apoh jangkhai,*
- => *Ichate School, Hostel Phapha kikoijou/IKaisahjoujep,*
- => *khopisunga Inmun kikichohjouva In pha, Innomdeu ineidohtheiju,*
- => *Mineinei Jeepje Car hoijep kineijouta,*
- => *Hb a Som akhat le Sumto kipetamjep thei,*
- => *Thilpha bol nadia Sumlepai kininglhingjep,*
- => *Von mantamtamle Insungmanchah thillelo Hoichehcheh ineitheiju,*
- => *Chule Inanei khahlou Insunga thilthah tampineiba ikigeljeh ule Leiset thil a kipana chamkim neitheija ikigeljeh u, hichehohi hilouham Aphatchomna itiu hochu.*

APHATMO NAHO VEKIT UTE,

Inaneikhahbehlou u

- => *Joule nal apunge/ikitah Nao imansah uvin,*
- => *Iselepha hetna Lungthimin them mo eichanjing uvin,*
- => *Ilhagao khutle keng eikanchom un,*
- => *Itaonao adaltanin, Lhagaola kisalingsamtan,*
- => *Thilse/Chonset geldaona apungchehcheh in,*
- => *Khamnathei ja lople Adict ihin neitam cheh cheh un,*
- => *Gucha le michom, Mijong Michavai akibejingin,*
- => *Michingdi tapi mingol asoh in,*
- => *Lekhathemdi tapi themmo inn aumin,*
- => *Kineppi umlai kinepnabei eisopeh gamun,*
- => *In nom Inhoi Inpha Atam cheh 2 in, Insungnom Insung phavang abei tul2 tan,*
- => *Pathenin Gouchinga Anganse Chate vetjuitheidi Nulepa bei cheh2 tan,*
- => *Inchen bouboipia Insungsemtupdi sumil tammongmongta,*
- => *Vangam Gou lupen Chatesanga Sumlepai ngailujole,*
- => *Pathen lungdeiholsanga Leiset thila tahsa nopsahnadi hol tamchehchehta,*
- => *Nampi Gaosapchan nadile, Christa Houbung thengtah suhsetnadia Chapa vahmangpabanga ivamangnao hinte.*

Hijehchun Christa a Sopingaite Khamnathei thil ibol houhi ngataote. Ajoule Leisetthil Sumlepaija chohjoulou Goulupen Ichateu I hinkimansahgam diu, chule I Houlaiju I Pathen ujong ihinkimansah teidiuvin aume. Asimjouse aphajocheh in Pathenin Lam dih apuijinghen.

KBC Executive Council



Achesa nisim 13th August 2019 nikho chun phatsottah jouva KBC Executive Council chu mipi deisahna bangan Centre Church Langol mun ah ana um in ahi. Nidan 7:00 am in KBC ponlap khaidohna Pu President, Rev. Tonglet Haokip in ana neijin KBC Executive Council ana kipan in, chu jouvin KBC Central Choir hon KBC Anthem ana sauvin ahi. Pathen houkhomna leh vahchoi la sahkhomna jong ana um in, Pathen thu a kimanchah na General Secretary, Rev. Dr. M. Thongkhosei Haokip in ana lamkai in ahi. Pathen lungsetna jalin muntin a um KBC Gambih lamkai ho, C/C thalheng, Board/Committee Chairman jouse leh member ho agom in mi 160 vel akikhom doh in ahi.

Council Session sungin Department Secretary ho akonin kumkim tohphon ana kingailhah toh lhonin Pathenin KBC phatthei abohna leh lamkai ho nasatah a amanchah dan akilangin ahi. Lamkai ho jal leh ama ho tosot jing houbung mite jouse jalin Pathen thangvahna ipeuvin ahi. Reports kichai jin Council Agenda ho CEC Recommendations leh Department jouse Finance, Mission, Men, Women, Youth, Music, Literature, Education, Development hon ahin peh u gelkhom na leh seikhomna ana kinei in ahi. Hiche sung hin KBC khonunga dinga poimo tah tah chuleh KBC khantou machalna ding jong tamtah ana kisei khom in ahi. Suhtoh thei, semphat theichan ana kibol in, aboi behseh ho jong General Assembly a seidingin akikoijin ahi. Nidan 3:40pm vel in Council session chu Pathen jalin chai in ana um in ahi. Session kichai jouvin ponlap khailahna Pu Zamkholal Zou, Vice-President in KBC ponlap akhailhan, General Secretary in taona amangin KBC Executive Council 2019 chu lolhingtah in ana kichai tan ahi.

Tuchung Council a mopohna eilah peh uva Centre Church Langol houbung mite jalin Pathen ithangvah uvin ahi. Jinkah a patna neh leh chah hihen, akingaicha jouse lhasam lou hel a apanlahna hou jalin achung uva kipathu sei joulou akiphongin ahi. Pathenin hiche sanga hoijo phajjo a pan alah jing theina ding uvin phatthei boh jing tauhen.

WORKSHOP ON SKILL DEVELOPMENT FOR PASTORS



Achesa nisim 12th August, 2019 Monday nikho hin CMAI (Christian Medical Association of India) tetoh KBC Development kitho khomin Chapel hall Workshop akineijin, Pathen lungset in lolhing tah in akichaijin ahi. Workshop Program Co ordinator Mr Jamlenmang Kilong, Regional Facilitator, NorthEast India, CMAI ahin, Resource Person (1) Dr Kim Haokip. Topic: FirstAid & Prevention. (2) Ms Esther . Topic: Basic Introduction on Substance Abuse ti ahil in lolhing tah in akichaijin kipa aume.

Gambih 17 Chassad Area Coaching



Gambih 17 Chassad area khangthah te in KBC Youth department tohgoh 3-8 October 2019 sunga Imphal Khumanlampak Sports Complex a umding Youth Connect a kichep gorseh jat chomchom a pan lah na ding in nisim 20/8/19 akon in Chassad mun na coaching akipan tai

PATE NIKHO



Achesa dt. 16/6/2019, nin L. Khuman b/c kbc no. 17, mun a gambih pastor speaker hinan pate nikho lolhing tah in ana kimang tai

Mr. Paocha, M/D. Chairman, Lakhan Baptist Church

CHOIR MEET



Ahesa dt. 18-22/6/2019, ni sung in kbc no. 17, choir hon Molvailup bc mun a youth conect a ding in akhat vei channa lazil na ana nei tau vin ahi

Letkhohau Haokip, Youth secy.

KBC No. 17 YOUTH TOUR 2019



Achesa dt. 4 - 13/5/2019 nikho sung in kbc no.17, Houbung jouse youth Tour akibol in pathen jal in lolhing tah in ana kichai tai, pathen in kbc no. 17, phatthei boh jing ta hen

Gl. Haoneo Haokip, Gambih Youth Secretary

OFFICE COMPOUND SOCIAL WORK



15th Aug. 2019 nikhon Head Quater Fellowship ten Office compound sung Social Work abolun Hitobanga tohkhomna thanomtah a pan la ho jouse chungah kipa thu akiseije.

KBC Development Inn Building



KBC Development project khat noiija KBC Development Inn Building Leimakhong a um chu phat chomkhat deibang a natoh ana umtheilou hita jongleh athah in committee in vilna leh tohgon patthah kit na ding in Dt. 20th August nin achung tin akikhu chaitai, Hiche lai mun jonghi adeh a khantou machal tohgon hoto kisai natoh ho neikhom theina mun khat a pilhing tah a semtoh a manchah ding hi committee in gelkhom na ana kinei dung jui a natoh hungki banjom ahin mabana jong natoh molso nadingin etaonauvin kopjing ute.

UNITED BAPTIST CONVENTION
LITERARY MEET 2019
ORGANISED BY: LITERATURE & PUBLICATION COMMITTEE
"Ama achu chihna le helna gou jouse kisela ahi" Col. 2:3
SUNSHINE CHURCH, NEW LAMBULANE, IMPHAL | 10TH AUGUST, 2019 (SATURDAY)



Post Regd. MNP/81
Regd No. 18134/88



One Day Skill Development for Christian Workers
jointly organized by KBC and CMAI
on 12th Aug. 2019

If undelivered, please return to
The Editor, KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173